

العمر على قهوة

العمر على قهوة

نهى بهمن

شعر

تصميم الغلاف : مصطفى نوبي

رقم الإيداع : ٢٠١٤/٢٢٧٥

I.S.B.N: ٩٧٨-٩٧٧-٤٨٨-٢٧٠-٨

دار اكتب للنشر والتوزيع



الإدارة : ١٠ ش عبد الهادي الطحان من ش الشيخ منصور،

المرج الغربية، القاهرة .

المدير العام : يحيى هاشم

هاتف : ٠١١٤٤٥٥٢٥٥٧ - ٠١١٤٧٦٣٣٢٦٨

E – mail : daroktob1@yahoo.com

Facebook : دار اكتب للنشر والتوزيع

الطبعة الأولى ، ٢٠١٤م

جميع الحقوق محفوظة ©

دار اكتب للنشر والتوزيع

العمر على قهوة

نهى بهمن

شعر



دار اكتب للنشر والتوزيع

إهداء

"بفضل من أحمد.... إلى أحمد.... إلى فارسي النيل... إلى أمي ثم
أمي ثم أمي ثم أبي.... إلى مصر التي تعيش في وأموت فيها... وإلى
العفريت حرنكش!"

إلى محمد يسري سلامة

آه أعرفه... ما هو أسمه موت...

داير يدقق عاليوت... العطشانين....

يا خد معاه... الطيبين...

مين اللي قال الموت فراق....

الموت سباق.... ما فيهوش رجوع

ولا عدتش أفهم ليه بنلقاه بالدموع

بيقولوا إن الموت وجع....

لكن حقيقي الموت جدع....

ياخذ فأحضانه الجدع...

ويسيب على الدنيا البدع...

أطول مسافة ممكنة....

الموت وطن.. لا بد جواه نلتقي

ما يعترفش بأزمة....

الموت بريء من حزننا...

ساعة المطر...

لا بد نجهز للسفر.....

علشان نغيب كما صاحبي غاب زي القمر

٢٠١٢-٣-٢٤

مكعبات

صندوق خشب...
مليان بيوتي مكعبات...
صغرت على حلمي البيوت..
يا حلم سييته سنين هناك...
بين اللعب
وسط السكوت
شد الخيوط العنكبوت
واخرج بطل راكب فرس
رجعلي صوتي اللي انخرس
إطلق عنان قلبي اللي آسرينه الحرس
رن الجرس صورة وصوت
يا عمر فات... دايب تعب
كان نفسي أعيشك جوا صندوقي الخشب
أبنيك ساعات.... أرميك ساعات.... بين اللعب... ومكعبات

شِدُّ الوجع

شِدُّ الوجع....
وارميه لأبعد نقطة فوق...
خليه يفوق ... كل الحدود الممكنة ...
في مكان هناك....
مايعترفش بأزمة ...
مافيهوش بدع ...
هاتلاقي فيه كل الكلام اللي انبكى...
ولم ينسمع ...
خليك هناك واوعاك تخاف...
كله يجوز...أو محتمل وعليه....خلاف
إلا اللي شاف....نور البراح
ساب همه راح...
شد الوجع...
وارميه لأبعد نقطه فوق..

هايشيله عنك اللي ليه دائماً وجود..
واعرف إن الدنيا دايرة صغيرة...
خلي عنيك دائماً عليه...
أصل الوجة ممكن يعود

الغول

(مفتّح)

وقالوا لنا في الحواديث إن البطل فارس
راكب حصان أبيض ولأُمّته حارس
وف حدوتنا اليوم دوّرت مئة مرة
وف كل مرة أنتهي ملاقيش بطل خالص

الليلة دي واحنا واقفين النهاردة...

راح يطب الغول علينا..

يخطف البنت الجميلة ...

هاتنادي تصرخ يا حسن..

وماعادش فيه شاطر حسن

الشاطر اللي كان حسن

مات واندفن

يوم ما الكرامة اتبهدت

واتبدلت...

يوم ما الغيلان جات واشترت

كل حواديت الزمن

وماعادش فيه شاطر حسن ...

أيام زمان الشاطر اللي كان حسن

كان يحمي كل الغلبانين والتعبانين

كان يرسم العدل ف طريق المظلومين

ولاجل ست الحسن ما يهاب العرين
كان يحمل السيف الذهب ويروح
يقاتل ألف غول ... كان ينتصر
عمره ما يوم جه وخسر
غير لما سيفه صار خشب
من يومها حال كل الحواديت انقلب
والغول بقى هو البطل...
والغول بياكل كل شيء...
الأرض والخير والكرامة...
الغول بياكل أي نبتة طالعة تحي في الطريق
أصل الغيلان ما تحبش النبتة الولد
من يومها صار ثوب البلد
هو الكفن ...
دي الوقت واحنا ملمومين
متكتفين ...
مستنيين الغول هيجي زى عادته ف كل ليلة
يخطف البنت الجميلة
هتنا دي تصرخ يا حسن
يمكن يعود الشاطر اللي كان حسن

ابن آدم

هربان من الدنيا وواحد شنتته ومليتها بمومه
وفـ سكتة تتقل وتتقل خطوته وعينها بتلومه
كل الطرق منها..... بتخرجه ليها
علشان يزوِّغ منها لازم يعيش فيها
مش عايزة ليه دنيته تمشي على عومه ؟
قال لازم أطلع قام طلع
وماكانش أكثر من صدى هدومه

الفاترينات

الفاترينات كترت ف دنيا صعب فيها تشتري إلا الهوى
حتى الهوى شاحح ساعات ...
الفاترينات كترت ف دنيا صغيرة أصبح قانونها بس هات
واما وجدت في جيبي حبة قرشينات
قلت أشتري شوية كرامة ...
وتمنّها كان غالي قوي
قمت اشتريت حبة سكات

يا حاميين الحمى

الحيرة إن العدا يبقوا كما لوني...

يتكلموا لغوتي...

الهيئة من بره تبقى تمام هيئي

يا لا بسين هدمتي...

إزاي تعروني؟

عروني يا دنيا راهبة.... ورقاصة

حتى التراب رافض يواريني فأحضانه

ولا عندهمش كلاب... ولا حتى قناسة

وطلعت أنا المسجون.... وانا اللي سجانه

يا حاميين الحمى... مين منكوا يحميني؟

روحي على كفي.... همي على جبيني

فاتح لكم صدري... والقلب مالوش زي

عطشان من الغربة....مستني بكرة الجاي
ليه قلبكم ميت؟؟.....يا لي رصاصكم حي

العمر على قهوة

أنا قاعد ومستني وبحلم بيك يا بكرة الجاي
وصحبة وحدتي هي قلم فاضي وواحد شاي
يا واحد شاي مايخلصشي...
قلم فاضي ما يكتبشي...
أنا قاعد ومستني ما بتعبشي... ومش هسأل هتيجي إزاي ؟

يا عمري ليه بتتسرسب وتقرّب مني على سهوة ؟
دانا لسه يادوب هقرا نصيبي ف حبة القهوة
ولا مني لحقت أشرب ولا مني لحقت أهوى
يا محبوبي يا صوت الناي
أنا عمري حتت سكر وداية جوة واحد شاي

يا عمري ليه بتتبخر وطاير فوق كما الدخان ؟
بتجري ليه ما تتأخر وطول أكثر من الإمكان
د انا لسه هشوف سكة سفر جاّيه مع الفنجان
يا فنجاني...
أنا طالب هنا قهوة بوش بريء وإنساني...
بقالي زمان

حسي أنا موجود

أنا مش عدد ف ليمون... ولا إسم ف بطاقة
أنا روح وطعم ولون... وولد بيتشاقى
مليان حياه وجنون... يا دنيا سرّاقة
أنا وش في الزحمة.. بيتوه ويتلاقى
حسي دانا موجود

وكتبت إسمي كثير...
على حيطه وكراسي مظلومة في الأتوبيس
باعمل ساعات ناسي....
وبعمل ساعات طيب... و ساعات بكون إبليس
وف دوشة الزحمة... صوتي غنا الأحاسيس
أنا دندنة عالعود....
حسي دانا موجود

ما عرفش أعيش خايف....

متدّاري من صورتي ف وشوش تخيّني

وبغني في المطرة وبسيبها تغسلني وتكتب على جبيني

ولا عشت جنب الحيط ولا عمري قتلها يا حيطة داريني

إنساني لا محدود ...

لا عدد ولا محدود...

يا دنيا حسيني أيوه أنا موجود

برّا الصندوق

جرب تحلم برّا الصندوق
أخرج برّا حدود الدنيا الماسكة عليك
صاحب أجراً عفاريت الأرض...
من فوق الأرض
من تحت الأرض
خليها تزقك برّا الكون
إضحك من قلبك لو قالوا عنك مجنون
فك المقيود...
لو كان ممنوع كان إيه خلاّه موجود
غير شكلك لو كان يشبه كل الأشكال
غير إسمك لو كان إسمك...
عبد المحدود!!

أبو ضحك قاتل

إلى الراحل جلال عامر

وسألت نفسي كثير يا عامر قلبك وقف عن دقه ليه؟

يا ما طبول دقت علينا ولسه فيه

مين اللي قالك حب بلدك بالقوي؟

من اللي قالك تنقهر لما يجيك حكم القوي؟

موثني مالمضحك ليه.... لما انت مش قادر عليه؟

يا أبو ضحك قاتل سودوي

ضحكتني على حالي ليه؟؟....

وخطفت وياك ضحكتي... ولا عادش فاضل إلا حالي

وقلم حزين

مستني تاني قبضتك... رافض يطاطي أو يوالي

وسألت نفسي من جديد

طب ليه البعيد ابن البعيد قلبه حديد؟

ليه يا بشر كل ابن كلب.... مخلوق وقلبه قاسي صلب؟
وعرفت إن جواب سؤالي ماكنش صعب
مين اللي قال كل البشر زيك يا عامر عندهم في الأصل
قلب؟؟؟

قرار.....انتحار

لو شمعہ یوم أخذت قرار بالانتحار....
ولقيتها يوم جت وانطففت.....يبقى اكتفت
من حد ناسي إن نورها أصله نار
من حد قرر يفتكرها ف ضلمته ويسيبها في عز النهار
من حد عمره فيوم ما فكر...
يعني إيه تاخذ طريق ...
وأنت عارف....
حتما نهايتك فيه تكون الإنصهار

أرض ثابتة

دوري بيا يا أرض ثابتة...

حرّكيني

نفسي أخرج من كياني لأي حتة

خطوه أثقل من همومي... خطوة تبته

سايبة عمري... يجري عاوز يفترسني ...

وهي ساكتة....

أفتح الباب ألقى يومي يتدي مديني ضهره

أبتسمله

يزيد ف قهره

أسبيه تاني

أجري وافتحله دراعاتي

يزقني... أرجع مكاني

يزيد ف شرّه

مين يقلّه ؟

كفاية ضرب
البعيد ده ماهش قلب؟
عمري يا رمانة حَب
لو ف يوم بعترته مني
هالف أنادي ف كل درب
حد عاوز يشتريني
اسمي واحد
جوا واحد...جوا واحد...
جوا شعب

تزيد القيود

ولا عمره شافها

على رغم إن المسافه مفيش

ما هو البعد عمره ما كان بالمكان

ولا السجن عمره ما كان بالقيود...

ولا بالحيطان...

تزيد القيود اللي قادرين عليها..

ولسه الجمال اللي فيها... طليق

ولساها عايشه يا حساس بريء

بنفس الحكاية بتاعة زمان....

ده شاطر حسنـ "ها"

كان ابن الجيران

تعدّي السنين ...

ويكبر حسنـ "ها"

يهد القصور اللي كانت رمال...

ويبي عماره
ويحلف بأن القمر للعيال..
دا في الأصل ضلمة وحة حجارة
وإن الشجر مش عشان الأحبة...
دا مخلوق دولاب... واكوام نشارة
تدور السنين...
يعدي الزمان
ولساها هي كما هي جنبه
وشاطر حسنـ"ها" على رغم قربه
سايبها وبعيد...
وناسي الحصان

صدفة

أنا اللي أخذت مال الدنيا نصيبي.... وكان يدوب فتافيت....
بدرت عليها أحلامي عشان تطرح قصاد البيت
ومين قال إني هاستنى فانوس سحري أقوله ياريت
وليه مابقاش أنا الجني....وليه مابقاش أنا العفريت؟

مانا اتعودت أعيش الدنيا دي بلهفة..
ساعات أحسبها ألف حساب....ساعات أرميها للصدفة
كثير أفتحلها الأبواب...والاقي عيوني مش خايقة...
تشوف أكثر من المكتوب...
ولكن يبقى بس إزاي وعمري يادوب....
جُمل خاطفة

أنا عارف تعبتي يا دينتي معايا...
مانا أصلي بموت فيكي ومتعلق بقشاية...

وبتلّكّ عشان أسرقلي ضحكاية...
وبسأل لسة قدامي...
يادنيا ولاّ جوايا؟
كفاية هروب...
أنا واقف ومستني وعارف إن كلي عيوب....
وعايزك تيجي ويّا

صفحة منسية

وهافضل صفحة منسية ف حضن كتاب....
وبنت دموعها غلباها بلا أسباب ...
وحد بتخطفه ف حضنك فأخر وقت
فتسجن خطوته الراحه لحد الباب
عشان بتشوف ف كل الناس حاجات منه
غيابه يطول... تدور تسأل وشوش عنه...
ولما تملهم تلقاه فأحلامك... يطول البعد
يتبسم كإنه ما غاب ...
وتستناه فأخر عمرك المزحوم ...
هايجي أكيد عشان يرحل ويبعد يوم
وبين الآه فطعم لقاه فتر حاله...
تلملم روحك الدايبه فمواله..
ويحكى كلام مايتد'ش سبق قاله وعاده عذاب....
بتعشق كل شيء منه ولو كذاب...

أنا المودوع وتسألني ومش عارف أرد بياه...
وانا المودوع...
وعارف مين سلب روجه...بيخدع فيه...
ومهما تقوله أنا منه ومستسلم وعایش لیه...
بكل مافيا من لهفة ومن إحساس...
لأنه اللي قدر يعرف ما بين الناس...
ويسألني وانا بضحك بعلو الصوت...
عيونك مالها مجروحة بتبكي سكوت

...

حُضْن القَوَارِب

مين اللي قال كل اللي عنده عينين مفتح؟
مين اللي قال كل اللي متعلم بيفلح؟
مين اللي قال شعري يشيب وانا لسه متشبث ببابك
واقف هنا وبرغم إن الكل سابك
ولا لاقى حاجة تبل ريقى...
ولا شيء يفرح....
ولا حتى عادلي فيكي مطرح

لما اتولدت وقالوا لي أمك... قررت أحبك
لكن عرفت معاكى إن الحب صعب...
وازاي أحبك بس أنا وانا أكلي ضرب؟!
وغنايا غلب...
وازاي أحبك بس أنا... وأنتى اللي غالية واللى عالية
والبعيدة لفوق لفوق سابع سما

وأنا ابن كلب؟!

مش مستواكي

ابنك صحيح لكني مش عارف أكون على كيف هواكي

مش عارف ألبسلك ثياب التتاشين والهباشين

وأنا ابن مين ولا مين أكون علشان أعيش نايل رضاكي؟

علشان بأقدامي أدب؟!

لو بس مرة تفهمي... لو ليكي قلب؟

أمي الحبيبة سامحيني يا ست الحبايب

إبنك خلاص...

ولا عادله حق يحب فيكي ويشتهي ولا عادله نايب

إبنك خلاص...

ماشي ف زمان اللافتات.. ماسك فُتات

بيقول يارتلي كان ف يوم م الحب جانب

كان نفسي تحميني من الزمن اللي ورآني العجايب

كان نفسي أحبك وأنصهر

لا أنقهر... لا أنكسر

وألأقي نفسي في النهاية ف حضن قارب

عيوني لفوق

يا خالق نفسي أمانة بسوء... ورا سوء
أنا عايش... وزادي إني هارجعلك ف مرة وافوق
دانا حبة تراب واتحولت مخلوق
يا خالق ضعفي إنساني...
أنا فاني....
وعارف إني مهما أبعد هاجيلك أجري من تاني...
وانادي عليك بلهفة وشوق...
دأنا في سؤالي للمخلوق عيوني لتحت
وليك في سؤالي يا مولى عيوني لفوق

ساعات

ساعات....

نعيش الدنيا حافظينها ومش فاهمين
نتوه والسكة تخدعنا ونعمل إننا عارفين
بنتخبط ونتلغبط....

ونرسم عمرنا مشخبط....

ونكتب عالشجر تاني هنا راجعين

ساعات...

نعيش العمر بندور على شيء راح....
ونرسم باب لأحلامنا وننسى نرسم المفتاح....
بنجري كثير ونتكعبل....
نقوم دا العمر مستعجل....
ونسأل مين ياناس عايش هنا مرتاح؟

ساعات...

نسيب العمر يتسرب ونرضى نعيش كما الأغراب...

نسيب روحنا بتتعب ونجلدها بألف حساب...

نشد الحبل ونسيبه...

وناخده كثير على عيه...

ولو حاول يكتفنا نشده علينا ونجيه....

ونعمل منه مرجيحة قصاد الباب

ساعات...

نحس ياننا ورقه لفوق طارين...

نسلم نفسنا ونرضى بحضن الريح شمال ويمين...

نعيش الدنيا وتعيشنا....

ونحضنها تكرمشنا....

ف نخطف منها سطورنا....

ونكتب جه خلاص دورنا وكده خالصين

ماريونيت

كله متعلق ف خيط...
كله مربوطله الجرس..اللي ثاير والغلابة والجرس..
كله بيلف فدواير...كله بيعيش المآسي..
ناس بتعجبها الستاير..ناس بتعجبها الكراسي
ناس بتسأل يا حماسي....ليه سكت؟
ياللي مش عارف حقيقتك...
ياللي مش عارف حقيقتي...
مرة زيك اتفاجئت...
إننا في الأصل شلة من عرايس ماريونت
كله مستني الإيدين اللي بتحرك خيوطه...
اللي بتحدد حياته...واللي بتحددله موته...
مين يلومني عن سكوتي...
مين ألومه عن سكوته

مين يحركني بإيده..
مين يسلف صوتي صوته..
نفسى أقول إني تعبت..
كلنا في الأصل شلة..
من عرايس ماريونت

متكرب

لا عيوني عاد فيها الضيا يبضحك
ولا عدش شعري حلو متسبب
وشي صبي وتحسه لون وردك...
لكن ف قلبي الحزن متكرب
ياللي عاططني البحر خالي الشطوط
إزاي تسييني هناك بلا مركب

ياللي فاكرني صاحي بتنفس..
مش كل من فتح عينيه شايف...
دنيا بنخبط فيها ونحسس...
ولا عمرها ضمت صغير خايف..
نفسى أبوسك مرة واتأسف
لكني مخلوقة بلا شفايف

أنا المجنون

شروق وغروب.....
وناس تغلط... وناس بتوب
وناس بتقضي أيامها هروب ف هروب
وناس عايشة ومش عايشة بتتسبب ف يومها يادوب....
تفتح عينها مش شايفة....
تدور ف سواقي جواها كثير خايفة....
وتتنهد تقول مكتوب

وأنا ماسك قلم سحري
وبرسم صورة للملحى.. بلا أحزان
وبرسملي قمر طالع..
وبنت جميلة بتغني.. وبتحني ضفايرها بلا ألوان
ولما حد يسألني هاقول تايه فملكوتها...
وكل اللي اعرفوا عني أن أنا إنسان....

رفضت أعيش سنين العمر بهتانة..

وأنا بهتان

أنا ماسك .. قلم سحري .. يرسملي براح الكون....

ويرسم دنيتي خالية... حدود وسجون....

ويرسملي ساعات أحلام ماحققهاش

ويرسملي كلام يتعاش ...

وحتى مرة لو شخبط بتطلع رسمته حلوة بمليون لون

وقولوا عني ماتقولوا .. أنا المسحور.. وأنا الطايش.. وأنا المجنون

ولو سيبتوني وبعدتوا... راح أرسمني

وأعيش وايايا من تاني ...

وهرسمني أكيد أحلى... وهابقي كل خلالي

وهابقي قلب يحضني وجوا منه ينسناني

وهابقي حنون ..

وقولوا عني ماتقولوا

أنا الطايش... أنا العايش... أنا المجنون

رجى ورجوع

ولا بلقى ف هواك ممنوع...
ولا بلقى ف رجاك ممنوع
وحتى كلامي مهما يزيد..
ومن عيني وقلبي يفيض... أكيد مسموع
ولا يحتاج معاك ترتيب
وبنسى بين إيديك نفسي وأغلى حبيب
ومهما الجرح كان قاسي لا بد يطيب
ولا غيرك قريب مني وأنا موجوع
أنا الدايب خجل وكسوف
أنا التايه على رغم الطريق معروف
أنا حبة كلام وحروف
ولا بتمل تسمعي على رغم الغلط معتاد.. على رغم الكلام
مألوف
أنا الملهوف... وروحي الدايبة من نفسي ألم وخشوع

دانا مهما مشيت للناس طريقها بعيد
وليك الخطوة لو واحدة رجي ورجوع

الحبل والدنيا

أنا والحبل والدنيا...
نشد فبعضنا دايما... ولا بنخاف...
أنا والدنيا ماسكينه...
وماشين الطريق عكسي.... وخلف خلاف

دي دنيا ماشية تتفلسف...
وماسكة حلمي متكتف...
أنادي عليها تنساني...
ولما أهجرها تتأسف...
وتيجي ف بردي تكسيني.... بتوب شفاف

يا دنيا ياللي فائتاني وفاكرة إني مستني...
أنا بايعك ومستغني...
ولو شديتي قدامي وداب العمر... إيه يعني..

هاسيب الحبل... واتحرر..

ولا مين حس بالدنيا....

ولا مين شاف

طعم الكلام

طعم الكلام لما يكون سكر
طعم الكلام لما بيتمر
هو الكلام نفس الكلام واحد
يمكن أنا وحدي اللي بتغير

شايل كلامي هموم على أكتافي
وف بحر عمري هو مجدافي
موجة أنا ومش عارفة أعيش إزاي
لما يكون العمر مش صافي

شنطة سفر عايشين نحضرها
مهما نفتش شائلة أسرارها
الكل شايل شنطته وماشي
ولا حد ياديه إنه يختارها

ياشنة ملانة بأحلامي
ياشنة مزحومة بأيامي
شائلة كلامي... وماشية قدامي
بتشد فيا وعارفة مشوارها

فيك أهوى

عشان الصورة مش واضحة ،،،
بغمض عيني وافتحها عشر مرات....
ولا تتحسن الصورة
وبسرق م الكتاب صفحة.... واشكلها بإيدي حاجات
ف تطلع بنت أمورة ...
أغير منها... ف أشكل صفحتي مركب ورق تايه فبحر كلام
بيحكي حكاية مشهورة....
عن الفارس فتى الأحلام وست الحسن...
وغنوة حب رغم الحب مبتورة

أنا والغنوة والمركب ... بنتسرب من الدنيا
ونستنى القمر يطلع.. ونستناك
وأحلى ما فيك.. ياني فيوم ما حسيتك جيبى ملاك
ما أنا أصلي بشر عادي...
ساعات أكذب كلام أبيض...

ساعات أهرب ... ساعات أبكي
كثير أغضب ... وأكسر صورة ليا وليك بتجمعنا
ف يبكي قلبي ويلوم فيا مستغرب
ولا ينسأك
أحضر كل يوم قهوة ... وفيك أهوى ... وأستأك
وأحلى ما فيك كلام عادي ... بشر عادي
ومين قال إني محتاجة حبيبي ملاك

سنة واحدة

أنا عمري سنة واحدة
ويقولوا إن أنا عايش بقالي كثير
سنيي حبها المفروط بيتسرسب ...
وأنا داير أَللمها بلا تأثير
وجوايا ولد طايش ..
ومارد في الضلوع عايش ...
قلم محني... ورق بايش
وعصفورة وبتفررف ...
بتحلف إنها مخلوقة لأجل تطير
أنا القلب اللي عاش طيب
وأنا شرير
أنا نصين بيتخانقوا ويفترقوا ف جسد واحد...
ويضيع عمري ميت مرة ف يوم واحد....
ورغم إن الوجدع واحد... بلا تغيير

بلاقي الدنيا شايفاني بليون وش
ولما وشي يتكرمش...
ببص كثير على مرايتي وأقول معلش
دا عيب الدنيا ومرايتي... ومش عيبي
وأقلب شنطتي الفاضية.. وأشوف جيبي
ألاقي صورة مكسورة وحة غش
يا وخداني في روعي أسير
دا رغم العمر يوم واحد....
هاجيلك برضه واتأسف على التأخير

ساكنة عن الدنيا

أنا الساكنة عن الدنيا
وعقلي بالكلام زحمة وبه مدووش
وباتكلم على ورقي
ومهما قلت متلغبط وكله رتوش
وأبص كثير حواليا
يا دنيا م القلوب خالية... وكله وشوش
بتتبسم.. وتتلون.. وبتداري على عيوني
وجع.. ووحوش

أنا المقسومة بين نفسي... وبين نفسي...
وبين روحي
وأنا الإيد اللي توجعني ...
وبتطبطب على جروحي
وبتخاصم مع الدنيا

ف تهجري... ولما أرميها .. تؤمرني
وتنده فيا ... لا تروحي
أنا المكشوفة ... خبيني
ياعارفة السر ضمني ... ولا تبوحي

أنا وأنت مابينا كتاب على مركب ... وبحر غريق
وكام حدودته تجمعنا بتسرسب ... بلا تصديق
أنا القلب اللي عاش ملكك ...
أسير حيرتك ... ولسة طليق
براح الدنيا في عيونك ...
برغم الهجر محبوبي ورغم الضيق

أنا الساكتة عن الدنيا
وعقلي بالكلام زحمة وبيه مدووش
أنا الساكتة عن الدنيا
وماشية سنين ورا قلبي
وعقلي لما يندهلي مابسمعهوش !!!

بلاش تكفير

عشان أول ما قال سبحانه كان أقرأ....
هاسبح في الوجود باسمه..وبالتفكير..
أنا المخلوق دماغي الصاحبة بتعافر...ومش كافر
ولأجل الجنة مش ملكك...خلافنا كبير
بفتح في الضلام عيني...
وشمعة ديني ديني...هدى وتنوير
هاتبت فيها وأتعلم....وهاكلم
وهارفع للسما عيني...
وأقول يارب قويني..على التأخير
هاسبح في الوجود باسمه وبالتفكير
عشان أول ما قال سبحانه كان أقرأ....
بلاش تكفير

الصورة

عشان تخرج من الصورة أكيد لازم تكسرهما...
وترسم صورة لايقالك بتوب شفاف..
وتلعن أُمنا الغولة ...
وتخلع حملها النابت على الأكتاف
وتكتب تاني حدودة...
يكون عنوانها " يا غولة ماعدتش أخاف"...
وإيه يعني تكون السكة فاييتاني...
ونسياني.... وخلف خلاف
مسير الدنيا تلقاني ...
وست الحسن قهواني...
مسيري أتشاف

يا غولة فدائرة مقفولة ...
أنا خارج من الدائرة ولازم أعيش

يا غولة وعينك الحمرا.... عشان حمرا ما بتشوفنيش
ها عدي حدودك الفارغة بلا تفتيش
وها رمي كل شيء مني بيألمني... وما يشبهنيش

عشان الدنيا ملتوتة.... بلاش تستولي يا غولة على الحواديت
سيلي وحدي احكيها...
وأدندن دنيتي فيها قصاص البيت
ده أنا الفارس وأنا الحارس لست الحسن
وأنا الوارث تلال الحب ويا الحزن
ولا كليت من الغربة ولا ملّيت
ولو كنتي صحيح غولة... فأنا العفريت

الغربة

ساعات بنحس بالغربة ف حضن الناس
ساعات نسكت ف نتكلم معاني كثير
ولأجل الوحدة هي الأصل في الإحساس
أنا وروحي بنتوانس بحب كبير
أنا الساكت وأنا المسكوت سنين عنه
وييسيب عمره بمزاجه يضيع منه

ومش عاوزة من الدنيا وشوش خالص
يادوب كام قلب بيحبوني يستنوا
أنا البطلة فرواية لنفسي بحكيها...
واسمي فيها مش مكتوب على العنوان...
أنا إسمي فأخر سطر ف روايتي...
وروحي نفسها ترفرف ف كل مكان
وحدوتي دي محتاجة شوية صبر...

ولو تستنوا ويايا

هاتقروها وتقروني ... ف آخر سطر

حُضْنُ الْمَطَرِ

باحضن حاجات ما بتتحضننش...

زي المطر...

وافتح دراعاي قوي... لاجل أتروي... من ضمته
وأبكي معاه كل البكا... اللي مايحسوش بشر
ولا حد يقدر وقتها بفرق دموعي من المطر... أو لمسته
أبكي معاه.. وأما يبطل.. أحتوي كل اللي قاله ف شكوته

أما يبطل نمشي نتكلم سوا ..

وأقسم معاه قبل الرجوع صوت ضحكته

دور وهاتلاقي الحاجات ... نفس الحاجات

اللي أنت عديتها كدة ولا شفتهاش...

فيها غناوي بتتحكي...

ودموع بلا خوف تتبكي...

وقلوب كثيرة بتشتكي... ما سمعتهاش
كل الكلام سهل الغنى ...
كل الكلام سهل البكى... لكنه لم يتعاش
شد الحياة واندهلها...
روح قولها.... يا بقی یا إما بلاش

شد الرحال عن دنيتك
واترك وراك... كل اللي كان مألوف وعادي...
في صوت بعيد عاوز يدلك سكتك
ما تصد وهوش... سبيه ينادي
أحضن حاجات ما بتحضنش
وإبكي حاجات ما بتبكش
أفتح بيبانك للسما أصل السما ...
ما فيهاش مفيش...
جرب كده.... لي النداء
هاتلاقي روحك وقتها ما بتنطفش

بنط الحبل

بنط الحبل... وبطلع فوق ومانزلشي...
عشان الحلم ماكملشي....
وبامسك في السما السبعة...
وبحلف إني هاستنى..
عشان أنتي أكيد راجعة..
بكام نجمة..

تنورلك قلوب عتمة... مابتشوفشي
عشان الدنيا حدوتة ساعات بايخة
وفاترينة...
ولعب عيال....
عشان الدنيا كام مانيكان بيتنفس...
وحبة مال
هاسيب روعي ماين إيدك وهاطلع فوق...

وأشد حبالك الداية...
وهاغزل مني حدوتة وحلم وطوق...
ينجيكي..
ما أنا أصلي برغم الموت ...
بموت فيكي
وهيقولوا عليا شهيد...
وأنا قلبي ماييموتشي...
هانط الحبل... وهاطلع للسما السبعة...
ومازلشي

بلملم صبري من عالارض !

بلملم صبري من عالارض....

واضمه جوا أحضاني

وليدي يا ناس وراح مني....

وكان لي كل خلّاني

وليدي وكان قصاد عيني...

وغاب عنها على عيني

خدوا أيامي وسنيني....

وردوا ضحكته تاني

بلملم صبري من عالارض...

واضمه جوا أحضاني

بلملم بسمته الداية مع الكرايس....

ومصروفه اللي كان شايله لـ ليلة عيد

بيحلم يشتري بدلة ولبس رخيص
يدوب لهفته فيهم مع الأناشيد
وليدي ياللي زفيتك لحضن القبر...
بيدوني الفلوس لأجل أشتريلي الصبر
ومين غيرك يحليلي مرار المر...
خدوا عمري... وردولي وليدي ونيس

٢٠١٢-١١-١٧

ورق أبيض

ورق أبيض ...

وكام حدوتة بحكيها

ساعات عني... ساعات عن ناس

وكام حالة... وخلق قلوبها رحالة.... ف فرح وجرح وقوالة...

بلا أسباب

ورق أبيض...

كما قلبي..

وقلب حبيبي يوم ما حكالي غنيوة وسابني... وغاب

أدندن تاني غنيوته... ورغم البعد يسمعي...

يقول الآه فتوجعني...

وايه يعني.... نعيش الدنيا بنغازل أمل كداب

ورق أبيض.... بيتكرمش على حلمي ويخيه

ورق أبيض.... يسرق عمري يوم مني بلا تنبيه

بيحكولي كلام ماعرفت أنا معانيه.....

عن الورق اللي ماقسوملي ومستنيه

أنا العايش حمولي... وهمي بيه راضي

ومهما يزودوه أضحك وأقول عادي.....

وضحكوا عليا بالورق اللي قالوا أبيض

ف جيت أرسم عليه... قلمي طلع فاضي ...

فضل أبيض

بائعة المناديل

عشان يمكن
حيطان الشارع الواسع أحن عليكى من ناسه
ومن سلطانك الأمر
عشان أنتى أكيد هاتكويى بين قائمة ضمايرهم ...
لكنك برضه فى الآخر
عشان لابد فى الأول لكل وزير ...
وكل غفير فى مجلسهم ... حرس فاخر
عشان الأولى إن الشرطة تتسلح ...
وسيدنا الشيخ عشان يركن عرايته يكون مطرح ...
وإن البيه يطل علينا من شاشاته ويصرح
بصوت ساخر ...
عشان زيك أنا نفسى أصدقهم
وعقلي برضه مش قادر

طعم الفراق

جوا الدولاب
ساكنة الساعات.... ساكنة ودبلانة الهدوم
بردانة قتلاها الهموم....
كانت بتدفي بإيديك....
ألوانها ناطقة بالحياة منك وليك....
كان فرحها فرحك يدوم.....
عاشت بتستنى النهار ويا قدومك والقدوم....
مابقاش حبيبي مثل عادتك كل يوم.....
جوا الدولاب
كام صورة كانوا متشالين.....
كام حلم كانوا متساين.....
لوشوش جميلة وطيبة
قلقانة من غدر السنين...
ضحكة حبيبتك اللي دايب قلبهاوردة فكتاب

جوا الدولاب.....
حبة ورق متجمعة بين الرفوف....
وجواب قديم كان منها هجروه الحروف
وشريطة سودا جنب صورتك
اللي آن ليها الآوان....
تدارى من عين الضيوف....
لاموا الظروف....
قفلوا الدولاب

ولا تعاني

أنا اللي الدنيا ما قدرت وغلبتني
دموعي حببتي لاجل عنكي غلباني
ومهما شفت م الدنيا ما تعبتني
ما فيش غير صورتك البهتانة تعباني
وتستقوى الحمول وتزيد تفتني
أعاني وأقولهم تاني ولا تعاني
وعارف مهما علّوا الصوت وسكتني ...
هايفضل همسي بين روحك وسامعاني
ومهما يكسروا المجاديف عشان أرجع
ومهما يغلوا في الأتمان أنا هادفع
ده أنا اللي فتحت يوم صدري قصاص مدفع
وسايبهم كمان بيقولوا أنا الجاني ...
أعاني وأقولهم تاني ولا تعاني

الهدوم الدبلانين

البرد مش قد الهدوم الدبلانين
والقلب مش قد الهموم المتشالين
وعلى الجبين العمر مكتوب والسنين....
حييت أعيشهم.... بس طلّعوا مكرمشين
لفيت وآخر عمري لازلت الغريب
والجرح مهما يمر مش قادر يطيب
والشمس طالعة بمر...بتغيب لا يغيب
وناديت على الصبر اللي تاه لم يستجيب
لسة الطريق هو الطريق للمندوهين.....
اللي الحمول مقسومة ليهم عاجلين
ف يدوب طريقهم من حوّلهم والكسوف
إلا الزمن عاصي ومش قابل يلين.....
يا برد مش قد الهدوم الدبلانين

القطر

قالولي الدنيا زي القطر.....محطاته حياة وبيوت
وقالوا القطر عاوز صبروأنا صبري رضا وسكوت
يا قطر الحظ عديني.... وسييني وفوت
يا قطر العمر عديني.... وسييني وفوت
نصيبي ف توي متحني ...
وأنا واقف ومستني ما ليا شروط....
لقيتك جايلي مستعجل يا قطر الموت

أنا الصياد وبرمي أيامي جوا البحر....
وكل شطوطي منسية
وبرمي شباكي للدنيا ف تطرح مر....
وبجري مافهش جنية
وأنا الغلبان وحيلاي يا حبيبي الصبر....وقالوا وراك جهادية
وعشت حياتي بستنى كلامهم أمر....ياكل ماليكي مش ليا

وأنا النورين لعين أُمي... يطب القطر
ف تصبح عينها مطفية

و كنت حبيبي هاتكلم ف جاني الموت وسكتني
وبعتر صبري عالقضبان سلب روحي و فتفتني
يا قطر وجايلي بعد الصبر مستعجل
ما كنت تعدي وتفوتني

وتلمحها

وتلمحها....
تشبهها بعيل جوة منك تاه...
يمر العمر لم يكبر
بتسرق من سنيه حياة....وتستاه....
وعارف إنه لن يحضر
تقرب منها تلقاه....بنفس الحلم مستني
بنفس الصورة والمنظر
تلم كلام ما بين روحك فقد معناه...
عشان ماتقلش واناخر
تروح ملهوف...
تحس بحاجه فيك منها...
تحس بضعفها مألوف.....
يطب الخوف...
تدوب منك ما بين الناس كما السكر

تبص ف ساعتك الواقفة عن الإحساس...
وراك مواعيد وخايف عنها تتأخر...
تبص وراها مستتية تخطفها من الحراس..
تغيب عنها...
تلملم قلبها مكسر...
تسيب روحك بتتسررب بعيد عنك
عشان كرايب
تعود تاني ما بين روحك وحيد وغريب..
تبص ف ساعتك الشغالة بعد رحيلها.... تتحسر...
عشان الصدفة لما تروح...
ما بين الروح... وبين الروح
بيبقى صعب تتكرر

بطل الحكاية

أصل الحكاية بطلها مش فارس....
كل الفوارس فيها عالطرقات
وقر سلاحك ياللي ليك حارس....
من شاف بعينه الموت... ما يخشى ممات
الحب ليها ووحدھا خالص....
ومافهش ممكن لا ولا احتمالات
لو كنت شايف جرحي أو حاسس...
تعرف يان الأصل في الحكايات...
عدل وقضية وحلم مش ليا
والدم مهما يعدي لا يتفات

تموت أنت؟

تموت أنت "وأنا التاجر.... بكل ما فيك...
أبيع الدم والأحلام"
شبابك عزّه يتقايض بكام حدوده مغشوشة....
عن الحرية والشبابيك....
تسيب من أجلهم ما ليك
تقرب تفتح الشباك تلاقي الطاقة مقفولة...
وست الحسن مقتولة....
ماعاد صوتها ينادي عليك
لا منك رحت نجيّتها
لا منك عشت وياها وحييتها....
ولا عاد الرجوع ياديك

يبيع دمك...
ويشتري بيه عشان يطلع لفوق سلم...
وم العالي هايتكلم...

ومهما تقوله يامولايأ باتألم ...
ماعاد يسمع...
يدوس فوق حبك الصادق عشان يطلع
يقول الدم ف رقبتي ...
وعينه عليك ولا تدمع
لا عارف مين بقى الصادق...
لا مين بقى محترف يخدع....

تموت أنت...ولا يلينوا...
يلين الحجر
وست الحسن يا فارس ماعادت قمر...
بلاش تنده...على روحك
دي راحت هدر
عشان الموت ف أوطانك....
يادوب كام جملة محفوظة....
ووجهة نظر

سطوري العجاف

بلملم كلام من سطوري العجاف....
وحبة حروف لسة فيهم نضاف...
وأشد المعاني اللي ماسكة ف كياني وهاكتبك إني...
بحبك وأخاف

بخاف تظلميني برغمك حبيتي...
ما أنا أصلي عارف غريبة طريقي...
يشدو ف روحي...
أشد ف عزيمتي....
وما أحلى ف دروبك يكون الاعتكاف

بحبك قصيدة غريبة المعاني....
وغنية منسية بين الأغاني...
ووحدي اللي فاهم كلام القصيدة...

ووحدي اللي بيغني تاني وتاني...

وبيني وبينهم حبيتي خلاف

يصفوني نقطة ف نقطة...وعايش

وراضي بمكاني اللي جنبك ف هامش...

وساعحي طريقتي ف حيي اللي طايش..

مانا أصلي هاوي مليش احتراف

ست حسن

لم تطلعي يا حبيبتى أجهل ست حسن....
ولا ليكي فارس م الأساس....
ولا يوم عرفتي تفرقي بين ناس وناس....
لمعتي ناس كان أصلها تحت المداس...
ودفتني بين حضن التراب...ألماظ وماس...

يقولوا عنك يا حبيبتى ست حسن....
ويقولوا عنك طيبة...
طب ليه عرفتي تضحكي...
لوشوش كئيبية ومفرعة مليانة جبن...
وتكرمشي وشوش الصبا....
ياللي ف قربك أو ف بعدك متعبة...
أنا كلي حزن....

من عدلك اللي بالمقاس...
لم تطلعي يا حبيبي أجمل ست حسن....
ولا يوم عرفتي تفرقي بين ناس وناس

الضيا فيروز

على صوت الضيا فيروز
وع الفنجان بلون قهوتهما وسكوتهما
تصحي الصبح جواها
تفارق كل شيء دوشة...
ولا تفارق كلام كان قاله وياها...
بتمسك كل يوم جورنال...
تاريخه مش بيتغير...
بقاها سنين ونفس الحلم يتكرر...
يعود تاني....ورغم أنه بطول العمر متأخر...
هايرجع مش هينساها....
"أنا عندي حنين" بتعود...
ومستنية شمسه تعود...
يدق العود...وراه العود
ويرجع تاني يلقاها

طرح الوجد

قبل الأوان طرح الوجد....

قبل الأوان قام انجمع....

فات الأوان علي انخدع....

مهما يقول لا ينسمع

فات الأوان ... قبل الأوان...

ولا عدش عارف سكته...

ولا عدش عارف إيه يقول...

ولا إيه ساعتها سكته...

وعلى طراطيف ضحكته ...

شب الجدع...

ولا عاد فاضله منها ...

إلا وشاويش الودع

كل اللي شايله الحياة...
قادر يقايض عالسكوت ..وعلى الثبات...
إلا اللي شايله الساعات...
صوتها ينطق تكتكات ...لا تنتهي...
وبينتهي.....مهما يطول ما يشتهي...
شاف معجزات...
وبدل مايصنع معجزة..
ساب نفسه بين "لو" و"إذا"...
كسر ساعاته واللي فات
ولا عدش فاضل منها غير.....
الوجع..... والتكتكات

نص الكلام .. فاضي

نص الكلام فاضي ... وحروفه منسية

والنظرة حدوتة ... أوجاع مدوية ...

مونتاج على حلمك

مونتاج على وجودك ...

مونتاج على الألوان ...

لا قيود على حدودك

لا تقولي أنا إنسان ...

يشتد ليه عودك؟

أبو الثوار

أمسك قلم... ضم يديك كل الخطوط المتعبة... وارسم ملاك
البوح...

منغير حروف... أكتب كلامك لأجل وحدك تفهمه... وتغير
المشروح...

دا اللي بيمسك في القلم لابد يمسك روح ...
عارفة البكى...

عارفة الكلام اللي بلا صوت انحكى....

أصل القلم مهما فرح مجروح...

ضم القلم... واسمع كلامه ف ضمته....

حتى ولو قال شخبطة...

رتب حكاويه كلها المتلخطة...

أرفع عن الروح الغطا...

سيبها تقول كل اللي مش مسموح

ما علمونيش

كثير صورتك تطل عليك ماتشبهلكش.....
كثير تسمع كلام منك ماتفهمهوش
تقول محبوبي كان نفسي... عليك ف عيوني أتكحل....
ولكني ماعدلي رموش...
تقول ذنبي... أقولك لأ دا ماذنبيش....
ومالي بدنيا آخادة ومابتديش...
قالولي نصيبي جوا البحر مستني...
وأنا ماعرفش فن العوم... ماعلمونيش
ومالي عليا كل اللوم.... وأنا ماحلتيش
أشد الدنيا من أيدها... وأسألها على وجودي
تشد الإيد تقيدها.... وتربطني على حدودي
وتسحب روحي من روحي... وتعصر فيا ع الآخر
تجر جر عمري يوم ورا يوم... وتندهلي بصوت ساخر

"بتسألني على وجودك؟"... وقبل ما قولها "أيوا"
تقولي آدينا في الآخر

بلاش تسأل

بلاش تسأل عن المنطق.... بلاش تنطق...

ولا تدور على التفسير

بلاش تسأل بكام مبدأ حقيقي بيقدروا يعيشوا...

وكام مكيال ف مذهبهم... يوفي الكيل

ولو سألوك.. جاوبهم حقكم عندي...

أنا المسؤول عن الصورة اللي مغلوطة...

عن التقصير...

مانا اللي هتفت يوم....

حتى اشتكى صوتي يقول تغيير...

ومن يومها... وأنا والدنيا بنعافر...

ومن يومها ولا اتغيرش.... غير إسمي

...صبح "كافر"...

و اسم نظام... "جديد" من جرمهم قادر ...
يقابل كل شيء في الدنيا دي وعكسه...
بميت تبرير

حكايتك

تسيب روحك تروح منك لخصن الناس
تدوق بين حزنهم إحساس ...
تدور بين حكاويهم على حكايتك ..
وحلم حلمته كان فايتك ...
وقلب حفرت يوم اسمه على مرايتك
ولا سابلکش غير صورة وجع وناس

تسيب روحك تروح منك
وتفتح لأجلها الشباك
ترفرق بين قلوب عطشانة الوحدة ...
وم الأشواك ...
تدور بين حلمها المكسور قصاد منك ...
صغير بين حلمهم سنك ... ف مش شايفاك ..

تسيب روحك تدوب وتدوب ف حضن الروح ...
تلملم قلبك المجروح ...
تروح أبعد من المسموح ...
فـ روح حساك ...
تلاقي حبيب ..
فضل طول عمره مستني ...
عشان يلقاك

جوا البحر

ويرمي صورتها جوا البحر ...
يدوب الملح مـ الطلة...
وموج البحر يتحلى ..
ويسأل ليه برغم العمر..
بتقدر عنها تتخلى....
وتترك قلبها موجوع...


بيري صورتها جوا البحر...
وفاكر إنه يوم قادر...
يفيب عنها وينساها..
ولا يعرفش إن البحر...
هايجعل منها ندامة ...
بطول الليل تنادي عليه...

ولما يحب يلقاها...

تقوله خلاص ماعدش رجوع

يعيش مخطوف

تعيش العمر بتدور على إحساس يخطفها ..
يعرفها اللي مش معروف ..
في عز الضلمة يبقى الضي ...
يتجاوز حدود الشوف ...
يخاف الخوف ...
ويرجع قلبها صغير .. ويتغير
ويفضل حلمها ملهوف
ومين ممكن هايفهمهما ...
وجواها بينبض قلب يتمنى ...
يعيش مخطوف



عروسة بحر للجني

سكوتك بحر فيه أغرق
وصوتك بر آسريني
بحب البحر رغم البحر هاجريني
وهارمي البحر جوايا ...
عشان يغرق ويسحريني
عروسة بحر..تبقى البر طول العمر... للجني
بحب البحر يخطفني...ويخطف موجي والتوهة
يقولوا عني جنية...يقولوا عني مندوهة ...
ولم يندهني حد سواك ...
يدوب ملحي مع الميا
تدوب كل الوحوش فيا... ولا أنساك
يروح الناس ويحي الناس...
سكوتك بحر موج وناس ...
ولأجل لقاءك
تغيب العمر مهما تغيب ...
أنا ع الشط قلبي قريب...بيستناك

طعمك المالح

آه يا وجع من طعمك المالح
مهما يعدي كإنك امبارح...
يا شمس بردانة على توها....
كاشفة عيوها بضيتها الجارح...
يا حبيتي قلبك ليه بعيد وصعب
مهما بقرب لسة برضو غريب
بيشدوا فيا ولسا متشبث
روحي تسيب....
وأنا برضه مش راح أسيب
لسه بشيل همك على همي...
لساكي شمس مدوبة كمي
ملياني دوشة حد من دمي
ملياني زحمة حتى لما تغيب
ياشعرك المفروود على ضهري
ياحملك المفروض على ضهري
يا حيي ليكي ف سري وف جهري
بيدب فيا الروح حبيتي ديب

آه يا وجمع من بعدك الموصول
خلص الكلام وأنا لسه فيا القول
كله عقل وأنا ليكي مش ممتقول
مهما عملتي برضو ليكي قريب...
ومهما وجعتي برضو أنا مسامح
آه يا وجمع من طعمك المالح

ولا أجمل

ولا أجمل... من اليوم اللي يندملي مع شروقك
وف عيونك أكيد أغرق... ولا ينجديني غير طوقك ...
ولا يقتلني غير حبك...
ولا يحيني غير شوقك....
نقول فـ كلام بلا معنى...
نلملم فينا أوجعنا....
ولما الدنيا تمنعنا ...
تخليني عروسة بحر... تخبيني فـ صندوقك...
ولا أجمل... من الصبح اللي يحيني ...
بكلمة فـ حزن جورنالك...
وتسألني على حالي...
أقولك حالي من حالك
وابص عليا من عينك ...
عشان أقدر على وصالك ...
وما أحلايني لما ألقى....
وما أحلايني لما أبقي
يادوب حتة من السكر...

ودايرة جوا فتجانك....
أنا عقلك ..وأنا جنانك...
أنا الباب اللي مفتوحلك...وسجانك...
بجبك قد من يعشق...بجبك قد من يهوى...
وياه لو بس تهواني كما تهوى ...
شجن فتجانك المغرور بطعم الدنيا والقهوة....
وإدمانك

عن الكاتبة

نهى بهمن محمد

شاعرة عامية

مترجمة حرة

سكرتير نائب الرئيس التنفيذي لشئون المناطق بالمصرية

للاتصالات

من مؤلفاتها

-ديوان برا الصندوق

-أجل أسماء البنين والبنات من القرآن الكريم

من أعمالها المترجمة

-الرجيم المناخي

-كل ما تحتاج معرفته عن عالم الإحصاء

- ٥٠ فكرة يجب أن تعرفها عن الإدارة

- ٥٠ فكرة يجب أن تعرفها عن الأفكار العظيمة

-للتواصل مع الكاتبة:

على تويتر @nohabehman

عبر صفحتها على الفيس بوك noha behman

الفهرس

٥	إهداء
٧	إلى محمد يسري سلامة
٩	مكعبات
١١	شيد الوجع
١٣	الغول
١٧	ابن آدم
١٩	الفاترينات
٢١	يا حاميين الحمى
٢٣	العمر على قهوة
٢٥	حسني أنا موجود
٢٧	برّا الصندوق
٢٩	أبو ضحك قاتل
٣١	قرار انتحار

٣٣	أرض ثابتة
٣٥	تزيد القيود
٣٧	صدفه
٣٩	صفحه منسيه
٤١	حضر القوارب
٤٣	عيوني لفوق
٤٥	ساعات
٤٧	ماريونيت
٤٩	متكرب
٥١	أنا المجنون
٥٣	رجى ورجوع
٥٥	الحبل والدنيا
٥٧	طعم الكلام
٥٩	فيك أهوى
٦١	سنة واحدة

٦٣	ساكنة عن الدنيا
٦٥	بلاش تكفير
٦٧	الصورة
٦٩	الغربة
٧١	حضن المطر
٧٣	بنط الحبل
٧٥	بلملم صبري من عالأرض !
٧٧	ورق أبيض
٧٩	بائعة المناديل
٨١	طعم الفراق
٨٣	ولا تعاني
٨٥	الهدوم الدبلانين
٨٧	القطر
٨٩	وتلمحها
٩١	بطل الحكاية

٩٣	تموت انت؟
٩٥	سطوري العجاف
٩٧	ست حسن
٩٩	الضيا فيروز
١٠١	طرح الوجة
١٠٣	نص الكلام .. فاضي
١٠٥	أبو الثوار
١٠٧	ما علمونيش
١٠٩	بلاش تسأل
١١١	حكايتهك
١١٣	جوا البحر
١١٥	يعيش مخطوف
١١٧	عروسة بحر للجني
١١٩	طعمك المالح
١٢١	ولا أجمل

